

REGIONAL NEWS

HEADLINES:-

1. Union Minister of Information and Broadcasting Pu Aswini Vaishnaw chuan IIMC Aizawl-a Apna Radio Station din thar a hawng.
2. Adviser to Chief Minister Pu TBC Lalvenchhunga'n Union Budget pharh tak chuan kuthnathawktute leh kutkawih eizawna bultan tu te tan hmasawna tam tak a thlen a beisei a ti.
3. Vawiin khan Parliament in hnihah Union Budget 2024-25 sawiho chhonzawm a ni.
4. Union Minister of State for External Affairs Kirti Vardhan Singh chuan ram 16-ten Indian passport nei tan visa a thlawnin an pe a ti.

<><><>

I&B MINISTER

Union Minister of Information and Broadcasting Pu Aswini Vaishnaw chuan IIMC Aizawl-a Apna Radio Station din thar chu India Act East Policy atana mel lung pawimawh tak a ni a ti.

Ramchunga Community Radio Station 500-na tur IIMC Aizawl-a Apna Radio 90.0 FM internet kaltlanga a hawna ah he thu hi sawiin Union Minister chuan mipuite tana chhawpchhuah community radio hawn thar alo ni chu lawmawm atih thu a sawi a, mipui nunphung thlakin a tha zawnga khawtlang nun a her rem a beisei tih sawiin vawiina hawn thar tak chuan India Act East Policy ah mel lung pawimawh tak a phun tih a sawi.

Pu Vaishnaw chuan hmarchhak state tan Union Budget hnuai hmasawna tur chhawpchhuah tam tak zingah rel kawnga hmasawna a tel a ti a, hei hian inkalpawhna tha zawk a thlen dawn tih sawiin hun rei tak chhunga mipuiten anlo nghah tawh chu a takin a thleng dawn a ti bawk.

Chief Minister Pu Lalduhoma pawhin thu sawiin Mizoramah Community Radio Station hawn a ni ve ta chu lawmawm a tih thu a sawi a. IIMC Aizawla zirlai te tan leh Radio in a huam phak chin mipuite tan tangkai taka hman a nih chhoh a beisei dawn tih a tarlang.

Chief Minister chuan a bial, Serchhip chu a chhehvel ram ten azir avangin lo leh huan nei kuthnathawktu an tam tih sawiin anni puala Community Radio Station din ve a nih theih chuan loneitute zirtirna atan te, khaw chin leh an tana hriattur thil pawimawh te hrilhhriat nan a tangkai hle a rin thu pawh a tarlang a ni.

Union Minister of State Dr L. Murugan chuan Apna Radio Station chu mipuiten hlawkna an hmuh ngei theih nan tangkai taka hman a pawimawh a ti a, khuarel chhiatna a thlen lai leh hun dangah te an mawhphurhna hria a khawtlang tana tangkai taka thawk turin a chah a ni.

He hun hmanah hian Ministry of Information & Broadcasting Secretary Sanjay Jaju, IIMC leh MZU Vice Chancellor ten video conferencing hmangin an zawm a, Mizoramah pawh IIMC Aizawl atangin he hun hi zawm ve niin Doordarshan, Akashvani leh Press Information Bureau bakah IIMC staff te an tel a ni.

<><><>

LS MP

Lok Sabha MP Pu Richard Vanlalmangaiha chuan vawiin khan Delhi ah Civil Aviation Minister Pu Ram Mohan Naidu Kinjarapu chu a office ah hmu in Mizoram State mamawh te a thlen.

Pu Richard Vanlalmangaiha chuan Mizoramah Airport pakhat chiah a awm avanga indaih lohna a nasat thu leh Mizoram hmun hrang hrang atanga a panna kawnga harsatna an tawh nasat thu a sawi a. A bik in Mizoram chhim lama Airport siam chu a tul thu leh a hmunhma vel pawh engemaw chen hmalakna a awm tawh tih a sawi a. Civil Aviation Minister hian a hmunhma a ngaihpawimawh thu sawiin, Airport hmun tur hi a awm thei a nih dawn chuan hmalak a inhuam thu a sawi.

MP Lok Sabha hian Manipur buai avanga tlang mi ten Imphal Airport an kal theih tak loh avanga Lengpui Airport a thlawhna in daih loh nasat thu sawiin thlawhna service tam zawk a awm theih nan hma laksak turin Minister hi a ngen bawk a ni.

<><><>

MADC SESSION

Ni hnih awh Mara Autonomous District Council Fur thutkhawm chu vawiin khan zawhfel a ni.

Chairman Pu N.Viakhu kaihruai session chung hian ziaka zawhna chhan chi Unstarred question pakhat dawhkan ah chhanna dah niin, kaa chhan chi starred question 13 chhan a ni.

Official Bill pakhat The Mara Autonomous District Council Town Committee or council) bill 2024 an pass bakah Official Rules pahnih The Mara Autonomous District Council (salaries, Allownces and pension of Members) (Seventh Amendment) Rules 2024 leh The Mara Autonomous District Council (Social Welfare Department Group 'B' posts) Recruitment Rules 2024 te pass a ni.

Hei bakah hian Official resolution pakhat Pu MH.Tiabi EM(M/S) put luh MADC in Lakher tih Mara tia a lo thlak tawh chu Central sawkar in an thlak ve rih loh avangin thlak a nih theih nan MADC in hma la rawh se tih chu pass a ni bawk.

<><><>

LAWNGTLAI FUEL DEALERS

Lawngtlai District Petroleum Dealers te chuan thuchhuah siamin an sumdawna ah harsatna an tawh nasat avangin karleh Thawhtanni atangin an harsatna leh buaina chinfel a nih hma chuan Tuialhthei laklulh chhonzawmluh nise an ti.

Sorkar tha tihchak nan Central YLA chuan Rakhine State a Tuialhthei leh leitha luttur chu khauh takin an la dang chhonzawmzel a, tunthla Ni 16 khan Lawngtlai District Magistrate chuan Lawngtlai District a Filling Station te zawmtur thupek chhuahin Tuialhthei a man bithliah aia sanga hralhchhuak lo turin a ti a, Myanmar leh ramdang ah sumdawna kaihnawih ah Tuialhthei pekchhuah a remti lova, Lawngtlai District chungah dan lova Tuialhthei lei leh phurhluh a khap bawk a, mamawh aia tam bur a dawh District Magistrate chuan remtilo bawk.

Hetianga Tuialhthei khuahkhirhna District Magistrate in a chhuah hnuah District Magistrate thupek an zawm chung pawha tualchung lama an mahni dawrtu engemaw zatin harsatna an tawh fo vangin Lawngtlai District a Filling Station te chuan Tuialhthei an hralhchhuahna ah harsatna an tawh phah nasa niin Filling Station

enkawltu lam chuan an sawi a, an mahni dawrtute pawn harsatna an tawh fo vangte, an hotu lam atanga hun bithliah neia an hralhtur zat an ruahmansak angte pawh hralhchhuah theihloh palh mai hlauhthawnawm ah an din vangin an buaina leh harsatna tawh hi sutkian a nih hma chuan karleh Thawhtanni atang chuan Tuialhthei hi lakluh rihlo mai nise tiin thutlukna an siam ta a ni.

Lawngtlai District ah hian Filling Station paruk awmin, Lawngtlai ah pali, Sangau leh Bungtlang South ah pakhat ve ve a awm a ni.

<><><>

ADVISER TO CM

Adviser to Chief Minister Pu TBC Lalvenchhunga'n Union Budget pharh tak chuan kuthnathawktute leh kutkawih eizawna bultan tu te tan hmasawna tam tak a thlen a beisei a ti.

He thu hi Akashvani corr Isaac Zoramsanga nena an inkawmna ah sawiin Adviser to CM chuan July ni 23-a Budget pharh takah a hranpa taka lawmna tur awmlo mahse beiseina sang tak a awm a ti a, sawrkar laipui chuan sum dinhmun siamthat viau a tum niin a lang a ti a, hmasawna tura sum hman dan turah bithliah fel tak a rawn nei tawh dawn tih sawiin a hma angin huam zau a ni tawhlo a, enkawl dan felfai zawk leh sum hman dan ruahmanna felfai zawk an beisei tih sawiin hei hian sum dinhmunah nasa takin hma a sawn phah beisei ani tih a sawi.

Pu TBC-a chuan Budget tharah thalai hna zawng mek te tan hmasawna thar tur a awm tih sawiin Internship Scheme siam thar chuan thalai hna zawng mek te tan kawng awlsam zawk a hawn sak a ti a, Mudra Loan hmang tha te pawh a leta tam zawk an puk theih dan tur ruahmanin mi hnuaihngung ber thleng phakin scheme a duang tih a sawi.

Angel Tax tih bo ani chuan sumdawng tam tak lawmna a thlen a ti bawk a, eptu party Congress lam pawh an lawm tih sawiin Budget tharah hmasawna lian tham puan awmlo mahse CSR Fund atang leh scheme hrang hrang atangin Mizoram tana hmasawna tur a awm a beisei a ti bawk.

<><><>

UNION BUDGET

Vawiin Khan Parliament in hnihah Union Budget 2024-25 sawiho chhonzawm a ni a. Lok Sabha ah chuan Opposition lamten kumjin budget an dukhawp loh thu an sawi nasa hle a. COngress member Charanjit Singh Channi chuan tun budget in mipuite a tibeidawng a ti a. Parliamnet House atanga Dr. B R Ambedkar-a lim sawn anih chhan te zawtin Punjab state chu tun tum budget ah hian an ngaihthah hle niin sawrkar a puh a. MGNREGA hlawh a ti pung lo chu a dem thu a sawi bawk a ni. Hetihlai hian NCP MP Snil Tatkare chuan NDA sawrkarah Maharastra chuan hmasawna tam tak an dawn thu sawi thung a. Opposition lamte demin budget sawisel tur hrim hrim zawngah a puh a ni.

Rajya Sabhaah chuan COngress memembr Randeep Singh Surjewala chuan loneitute, mi rethei leh hna neilote harsatna chungchangah sawrkar a bei a. Loneitute sum puk ngaihdamna tur engmah siam a ni lo a ti a. Buh leh bal hralhna man bituk sak loah a puh bawk. AAP MP Raghav Chaddha chuan kumin budget ah hian ramchung mipui chi tin a ti lungawilo a ti a. Mi narante tan chhiah avanga phurrit siam belh anih thu a sawi bawk a ni.

<><><>

K VENA

Parliament Monsoon Session neih meka vawiina Rajya Sabha thutkhawmah Mizoram MP Pu K.Vanlalvena chuan ZERO HOUR ah thu sawiin ram pawn atanga Kuhva leh Sawhthing lak luh tih tawp a phut thu a sawi a.

North East-a kut hnathawktu ten an thlai thar kuhva leh sawhthing hralhnaah harsatna an tawh thu sawiin, thenawm ram dangte atanga heng thlaite hi India rama lak luh vang a nih thu Pu Vanlalvena chuan a sawi a. North East mipui tam takte ei leh bar a an inghahna chu Kuhva leh sawhthing a nih thu sawiin Myanmar atanga dan lova kuhva ro tamtak Mizoram leh Manipur kal tlanga lakluh a nih thu Pu K.Vena hian a sawi a ni.

India ram leh Myanmar ramriah India sawrkarin Custom leh Assam Rifles te a duty tir chungin ramri kal tlangin Smuggler ten Kuhva ro tam tak an la lut tih a sawi a, North East mipui tam tak rin dan chuan heng smuggler te leh sawrkar mi rawihte hi tangrual in heng sawrkar phalloh kuhva ro tamtak hi ramri kan in an la lut nia an rin thu a sawi bawk.

Hei mai bakah hian, Central sawrkar chuan China atangin sawhthing tam tak a chaw lut tih Pu Vanlalvena chuan a sawi bawk a. Heng sawhthing leh kuhva foreign ram atanga lak luh hian North East a kut hnathawktu te eizawna a tih chhiat avangin Sawhthing leh Kuhva lakluh hi tih tawp thuai a phut tih a sawi a ni.

<><><>

VISA

Union Minister of State for External Affairs Kirti Vardhan Singh chuan ram 16-ten Indian passport nei tan visa a thlawnin an pe a ti. Rajya Sabha-a ziaka zawhna chhangin Pu Singh-a chuan Indian Passport nei tan ram 40 te chuan visa-on-arrival an pek laiin ram 47 in e-visa an pe tawh a ti a. Sawrkar chuan Visa-free entry, visa-on-arrival leh e-visa pe thei ram ti pung tur hian theihtawp a chhuah thu a sawi a. Hetianga Visa-free entry pek chungchangah hian a thlengtun ram thuneihna anih thu a tarlang bawk a ni.,

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zuiang.Tun tum ami hi episode 112-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>